


賛海 卷八至卷十

集選


庫	文	閣	内
一四八函	三九七八	漢書	類
架	冊	號	類

庫	文	閣	内
三九二架	三九七八	漢書	類
架	冊	號	類

内閣文庫		
番號	漢	3978
冊數	32 ( 6 )	
函號	367	118








贊海卷之八

像

名賢

諸葛武侯贊

晉 習鑿齒



昔管仲奪伯氏駢邑三百沒齒無怨言聖人以為難  
諸葛武侯之使廖立垂泣李嚴致死豈徒無怨言而  
已哉大水至平而邪者取法鏡至明而魄者亡怒水  
鏡之所以能窮物而無怨者以其無私也水鏡無私  
猶以免謗况大人君子懷樂生之心流矜恕之德法  
行於不可不用刑加乎自犯之罪爵之而非私誅之



而不怒天下有不服者乎諸葛武侯於是可謂能用  
刑矣自秦漢以來未之有也 別本諸葛丞相集附載

諸葛武侯畫像贊

宋蘇軾

密如神鬼疾若風雷進不可當退不可追畫不可攻  
夜不可襲多不可敵少不可欺前後應會左右指揮  
移五行之性變四時之令人也神也仙也吾不知之  
真臥龍也 諸葛武侯集附載

諸葛孔明贊

宋胡寅

孔明一代之英遠謀宏議無一不售者至其自明之  
語曰謹慎而已何其約也詩不云乎惟此文王小心

翼翼昭事上帝聿懷多福若亮者有文王之小心矣  
彼劉禪凡庸何足以當元臣如此其敬而孔明事之  
靡不盡道握司魁柄總御六師而無專意恣行毫末  
可指者非盛德孰能臻此使曹操如聞孔明事幼主  
之規得不羞愧而入地乎 諸葛丞相集附載

漢丞相諸葛忠武侯畫像贊

宋張栻

惟忠武侯識其大者依義履正卓然不舍方卧南陽  
若將終身三顧而起時哉屈伸難平者事不昧者幾  
大綱既得萬目乃隨我奉天討不震不竦維其一心



而以時動意侯此心萬世不泯遺像有嚴瞻者起敬

張南軒文集 武侯受遺命贊 宋 郭大有

自古顧命未有若季漢君臣者昭烈之言有堯舜揖

遜之氣象孔明之對有伊周篤棊之忠愛其得人托

孤之寄得君委任之專與日月爭光可也 別本諸葛

藏 諸葛忠武侯贊 元 楊維禎

連東吳服南粵未為侯之功歌渭濱祭道上未為侯  
之德行八陣運牛馬未為侯之能朝無敵民無諱未

為侯之職於戲立鼎峙於三方受孤庸於六尺輔國

政而國不疑竭民勞而民愈力知之者以為伊周之

未遇其未知者以為齊仲父漢宗臣之匹也 諸葛武

載 諸葛忠武侯贊 明 宋濂

龍門子曰三代而下有合於先王之道者孔明一人

而其師以正動義也委身事君忠也開誠布公信也

御眾以嚴知也其功之不能成天也識者則謂其應

變將畧非其所長又謂其出師不攻瑕而攻堅一出

師乃與魏氏角其亡則宜又謂其仁義詐力雜用以



取天下所以失之是皆以權謀術數測孔明而孔明  
明白正大之心初未嘗知之也若三者之議真蛇鼠  
之見哉同上

武侯贊

明楊溥

草廬三顧出師二表志復中原天日皎皎同上

諸葛武侯像贊

明蕭鑑

桓桓武侯伊呂之儔興自草廬重噓炎劉援孫路曹  
勢成鼎足曰君曰臣情好日篤股肱是任爰託以孤  
志吞中夏名動八區推演陣圖江流石止不忘忠貞  
誓繼以死千載勲烈豈無其人惟公節義超卓罕倫

圖以像之臣焉時憲升堂拜公惟忠之勸

尚約居士集

諸葛忠武侯贊

明劉惟德

嗟炎漢之失鹿得南陽之卧龍遂扶三分之國於天  
下復立八陣之圖於蜀中忠精貫日義氣吐虹為一  
朝之雋傑邁千古之英雄出師獻表方陳要畧休兵  
于屯欲建大功雖云魏吳之主在知謀自謂超于管  
仲樂毅脫使湯武之君出其才實可配於伊尹周公  
噫為臣盡忠希公之蹤諸葛武侯集附載

又

前人

猗歟武侯德侔三代抱膝長吟孰易其介自都將相



孰以為秦轉危為安以小擊大雖嫌不辭之死靡懈  
人雖云亡不亡者在同上

關壽亭侯像贊

明 蕭鎡

桓桓關侯興于河東乘時叱咤萬夫之雄帝室豫州  
約為兄弟周旋險艱以死為誓摧曹脅孫治荆上游  
氣凌中夏勇莫與儔命乎數奇徒噓炎燼鼎足僅成  
迄今遺恨長身美髯儼然神人生氣猶在千載罕倫  
考公平生凜然忠烈觀像興思偉哉人傑尚約居士集

前將軍漢壽亭關壯繆侯贊

明 王世貞

嗚呼故主之誼表於奔袁討賊之忠見於許田樊城  
一師炎燼幾然前無衡操後有伏權天耶人耶公則  
奚憊精誠所鬱金石矢堅川停嶽摧風車電鞭君臣  
大綱如日行天我懷威神頌公萬年弇州山人稿  
前將軍漢壽亭關壯繆侯贊前人  
嗚呼篡漢者瞞也成瞞篡者權也瞞名漢臣也實漢  
賊也權陽瞞敵也陰瞞翼也公批亢於前而不虞姦  
於掖七軍甫淹六師隨厄使永安之恨不在許昌而  
在公安建興之師不出樊城而出祁山安樂之機與  
歸命之璧而相後先惜哉雖然不以間關而廢兄弟



不以離亂而廢君臣其時如者山嶽澄如者川流而  
炳如者日月星辰嗚呼此其所以亘萬古而猶神也  
耶 同上

漢壽亭侯關公贊

明 俞允文

惟公忠勇遭世孔棘赴赴虎烈披草騰跡協策贊主  
夙夜電擊洞開堅陣疎身刺敵效曹歸劉不忘舊德  
同拯天綱昂分漢室鴻運雖傾光靈允赫歷世欽祀  
罔不昭格神之休矣佑我邦國 俞仲蔚集

漢關侯贊

明 馮夢楨

桓桓關侯疏爵漢壽初逢先主輔車左右飛也同心

力扶顛覆報曹刺良雄名益張先主王蜀侯鎮荆襄  
降禁斬德七軍盡亡遷都避銳瞞也何怯白衣搖櫓  
蒙也何譎侯死不死至今烈烈侯產於蒲歸神章鄉  
中原江左萬里蒸嘗呼吸感應烈日秋霜侯武而文  
好讀左傳侯勇而義秉燭達旦絕倫逸群葛公所贊  
生為名將沒為名神如侯者希千秋一人我作贊詞  
佐岳纖塵 快雪堂集

關雲長贊

明 翁吉燭

吳魏固非公之敵手而公以一氣吞之荆襄固非公  
之善技而公以一臂承之固知昂足之難削而非公



之所之之公得蚩尤以嫁顯持世界而獨撐崑崙之  
第一枝寧謂死後之盛于生時嗚呼英雄毒眼無與  
為期容成業許六合毛眉戢階珠于粉面誅和璧于  
相皮謚公曰崇寧封公以真君侯帝而終不足以蕩  
公之名聲權儀小品

漢關王贊

明林大啓

龍髯赤面鳳目丹衷志吞吳魏臣屬漢宗取荆定蜀  
却敵衝鋒明燭達旦報効曹公威震區夏藐視江東  
刀揮斬馬若練衆彼赤兎追風復噓炎劉之祚幾成  
混一之功天下不祚漢大星殞空江流石轉遺恨夢

夢生膺侯賞沒加王封代著英靈顯蹟特晉帝號褒  
崇噫喜節烈之亘亘直曠今古而誰比踪鷄栖文草

繡關帝君像贊

有引

明

譚元春

壯繆畫塑廟食滿天下華亭顧婦買絲作繡號爲  
工巧信官沈惟耀得之歡喜供奉令其友竟陵譚  
元春爲贊竊意壯繆精光擊射依直怵□千萬世  
人如兔氣薰身不可思議一切文士擬語俱墮牆  
壁敬稽首沅硯下一讚曰

一生勇烈如霹靂墜欲叩精忠鐵泯線碎譚友夏合集

漢壽亭侯贊

明

徐枋



髯之逸羣有國士風風霆前驅日月在躬威震華夏  
千古為雄矣止氣吞乎當塗而勢壓夫江東嗚呼前  
有納肝同公不二心之極致後有碎齒繼公不兩立  
之純忠而皆未能如公有以褫敵國之魄而摧奸雄  
之鋒嗚呼我公此所以為千古人臣之宗

居易集

關聖帝君像贊

明錢謙益

絕倫逸群鬚髯奮張虎臣赳赳國士堂堂勒都山之  
鐵銘兮昭回漢鼎誓長沙之銅柱兮離立扶桑胡刀  
投而江沸嗟壘出兮山芒吁嗟乎威振華夏義薄昊  
蒼人心天日遺訓煌煌受佛付囑屹為金湯肩護法

之韋將踵衛世之四王人之欽公者以謂老瞞褫魄  
蚩尤遜藏龍章莫錫為帝為王不知夫玉泉老衲片  
語擊揚雲中投記刀下承當夫是以斷修羅趣歸選  
佛場千秋萬劫常依如來座下領八部而齊三光

集

管幼安畫贊

宋蘇轍

余自龍川以歸居穎已十有三年杜門幽居無以  
自適稍稍取舊書閱之將求古人而與之友蓋於  
三國得一焉曰管幼安蓋幼安少而遭亂渡海居  
遼東三十七年而歸歸於田廬不應朝命年八十



有四而沒功業不加於人而余獨何取焉其明於  
知時而審於處已云爾蓋東漢之衰士大夫以風  
節相尚其立志行義賢於西漢然時方大亂其出  
而應世鮮有能自全者潁川荀文若以智策輔曹  
公方其擒呂布斃袁紹皆談笑而辨其才與張子  
房比然至九錫之議卒不能免其身彭城張子布  
忠亮剛簡事孫氏兄弟成江東之業然終以直不  
見容力爭公孫淵事君臣之義幾絕平原華子魚  
以德量重於曹氏父子致位三公然曹公之殺伏  
后子魚將命至破壁出后而害之汝南許文休以

人物臧否聞於世晚入蜀依劉璋先主將克成都  
文休逾成出降雖卒以為司徒而蜀人鄙之此四  
人者皆一時賢人也然直己者終害其身而枉已  
者終喪其德處亂而能全非幼安而誰與哉舊史  
言幼安雖老不病著白帽布襦袴布裘宅後數十  
步有流水夏暑能策杖臨水盥手足行園圃歲時  
祀其先人絮帽布單衣薦饋跪拜成禮余欲使畫  
工以意髣髴畫之昔李公麟喜畫有顧陸遺思今  
公麟死久矣恨莫能成吾意者姑為之贊曰  
幼安之賢無以過人余獨何以謂賢賢其明於知時



審於處已以能自全幼安之老歸自海東一畝之宮  
閉不求通白帽布裘舞雩而風四時烝嘗饋奠必躬  
八十有四蟬蛻而終少非漢人老非魏人何以命之  
天之逸民 宋文鑑

管寧贊 有序

明 馮時可

馮子曰三國之際有管寧焉豈一節士耶少而遭  
亂渡海依公孫度度虛館侯之寧往見而不館也  
廬於山谷三十七年與物無競隣牛暴田牽至涼  
處善飲食之牛至大慙男女爭汲聞閭則多買器  
置井旁爭者自息黃初中被徵還郡自度康泰三

世所資遣悉封還之拜大中大夫不應拜光祿勳  
不應又詔青州刺史發遣所在給安車吏從茵薦  
道上厨食卒不赴正始二年寧踰髻矣復具安車  
蒲輪束帛加璧聘焉會寧卒拜其子藐郎中寧前  
後所歷于史可徵也夫其見度也視之鑿坏者通  
矣其受遣也視之却粟者涅矣其還魏也視之蹈  
海者懦矣然而公孫氏曹氏卒不能奪其匹夫之  
節而館之也貨之也臣之也則豈易及耶有道者  
之處世也任心而混跡任實而遺名能寄寂漠於  
群籟而不加傲睨於萬物寧之以仁化隣而以器



息爭也信有道者也與人相忘矣忘其賤者則亦  
忘其貴者其視夫度也康也泰也丕也叡也猶夫  
暴牛之隣也汲井之衆也而安得館之而安得貨  
之而安得臣之耶或曰否篡位者也若之何應其  
微也固矣曹氏主中國則寧且魏民也矧其始非  
漢臣也非漢臣而殉漢爲魏民而遠魏非也所謂  
或遠或近歸潔其身而已矣當漢末諸賢悉以角  
齒自毀而寧獨全於亂世使遇堯舜之主寧其夔  
契哉吾固曰寧非一節士也魏臣之薦寧也曰娛  
心黃老遊志六藝意喜此寧之所以爲寧也長夏

山中讀其傳有感也爲之贊贊曰

北海朱虛幼安其英韜儒韞老匿景銷聲去豈慕高  
歸匪圖羸海鷗公孫榆枋魏京苞苴終遣璽綬不纓  
鄙矣諸賢染指涕羹我也物役物也我傾與道委蛇  
則惟先生不冥不塵匪濁匪清螭游鳳食人貌天行  
雌雄區區一米八兵三國競帝惡乎成名皂帽布襦  
千祀遺榮人亦有言豈其必卿馮元成集

陳思王像贊

明王世貞

以爲讓當塗者心耶危五官者跡耶則胡以上責躬  
而不亮求自試而卒不獲攬繡虎之遺像撫銅駝而



歎息彼其諱不朽之大業者孰與夫仲之所得也并州山人稿

孫登贊

晉庾闡

靈巖霞蔚石室鱗構青松標空蘭泉吐漏籠蒼可遊  
津可漱玄谷蕭寥鳴琴獨奏先王體之寂坐幽岸凝  
水樸熙陽靡煥潛貞內全飛榮外散凌崖高嘯希風  
朗彈道有冥廢運有昏消達隱不巖玄跡不標或曰  
先生晦道逍遙稽子秀達英風朗烈道傷薰芳鮮不  
玉折兆動初萌妙鑒奇絕翹首丘冥仰想玄哲古詩類苑

嵇中散贊

晉李充

肅肅中散俊明宣哲籠罩宇宙高蹈玄轍同上

嵇中散贊

晉謝萬

邈矣先生英標秀上布巢洗心擬莊託相乃放乃逸  
邁茲俗網鍾期不存奇音誰賞同上

嵇康坐鍛贊

唐王績

嵇康自逸手鍛為娛曲池回繞垂楊一株銅烟寒竈  
鐵焰分爐箕踞而坐何其傲乎全唐文

李令伯像贊

明蕭鑑

李密令伯本健為人度事祖母寔以孝聞少任蜀朝  
郎署歷職既逮于晉後先交辟郎中洗馬累蒙恩私



欲乞終養抗表以辭惟祖母劉九十有六氣息奄奄  
常在床蓐情痛辭切于今千年人云已矣其辭則傳  
匪傳其辭實矜其孝凡百子孫是循是效尚約居士集

孔子堂杜預贊

唐張說

猗歟杜侯發揮孔聖春秋既立王道以正列國行事  
君子莫之他人有心予忖度之推凡見例定罪原詞  
開我後學從祀先師全唐文

羊叔子贊

明馮時可

自古山水之樂與夫富貴功名不能兼也堯之汾  
水黃帝之空同依托而言豈其質哉屈原遠遊思

欲揚雲霓鳴玉鸞以翱翔西極而陟升皇之赫戲  
張衡思玄亦遂思洛氛旄飄蜺旌問三年於勾芒  
據開陽而頽牀此皆意有所鬱而志無所泄故以  
此自廣非實際也若羊叔子者處富貴功名之中  
而能恬然澹然峴山漢水數數登臨若出塵離網  
而不自知為開府其信有風颺者耶平吳之規自  
公營之而竟以赴之後人不趨功而急利其氣象  
何如也登高而賦謀野而獲大夫哉評譔不足言  
矣鈴閣之下侍衛數人清香凝然遐思其人令人  
灑灑欲蟬蛸天地哉偶謁公祠於輿中為之贊贊



曰  
天經地緯公在方內雲逸風疎公在事外大信結吳  
不貪所獲大功與人  
不居其名登山有慨卧閣無防  
不塵不冥龍遊鳳翔  
馮元成集

嵇紹贊

世皆以嵇紹死得其所褒之予固愛其人行於亂世  
不污而能卒以忠為烈非其積累明于仁義孰能自  
信如此耶吾獨怪康與晉實比為魏臣其誅也豈犯  
有司特晉方謀篡魏忌其賢而見國故康誅而魏亦  
自亡若紹可為復父與君之仇者也力不能報猶且

避之天下顧臣其子孫而為之死豈不謬哉 宋文鑑

王祥扣冰魚躍贊

王祥之母鮮鱗是求冰連釣浦凍塞寒流精誠有感  
無假沉鈎二老同膳雙魚共浮 庾子山集

晉太傅謝公像贊

太傅之後子孫散處江東西甚眾若新淦莒州謝  
氏實其派系謝氏之良曰師軾者讀書好禮家藏  
李伯時所寫太傅像筆意精到卷軸如新非累世  
什襲之謹能如是乎師軾間託其鄉親予邑令丁  
侯屬予題跋故為之贊而復其後以歸之贊曰



江左之賢粵惟安石高卧東山累辭徵辟出為蒼生  
茂揚聲實談笑折奸從容勝敵王室奠安厥功誰匹  
簪組蟬聯才華傑特文武一門有光載籍遺像儼然  
垂示無斁

尚文毅公集

謝安石像贊

明王鏊

有晉太傅或傳其真去之千載如睹其人噫斯像也  
其當東山寄傲之時乎新城出鎮之時乎將盜溫問  
鼎秦兵壓境之時乎是何襟宇之冲夷風神之超邁  
隘視區寰翛然物外世方多故攸攘紛紜誰能起公  
坐清胡塵

王文恪公集

晉蔡謨贊

宋王回

晉自武帝酒色無度王公貴人競以酒色相侈而  
王愷石崇尤甚愷使美人行酒勸客飲不盡輒殺  
美人崇常夜飲諸少年酒裴綽乘醉竊臥崇妾中  
明旦裴家遣車迎綽綽上車馳去崇聞大怒立殺  
數妾將訟綽於朝綽兄楷書請綽曰吾弟酒狂海  
內足知足下飲以狂藥而反責之禮邪崇方慕楷  
欲交之亦憚其辭直乃止其後渡江諸君家往往  
猶襲故態紀瞻為尚書置酒請王導等觀妓瞻愛  
妾能歌新聲左僕射護軍周顛乘酒於眾中挑之



而不得有司勅顛荒酒失儀元帝特詔宥焉是時  
在位蓋不以淫營為敗如此蔡謨獨好禮自勅嘗  
詣丞相導導方作妓設牀席謨不悅而去導亦不  
留客也謨曾孫廓廓子興宗仍以好禮自勅達於  
朝雖時淫暴不敢稍侵媒之人稱其家風云贊曰  
古者牀笄之言不踰閫而賓主燕享所以觀禮樂講  
仁義也烏有男女亡辨晝夜荒盪群於禽獸而反以  
為樂與此屠餘所以知中山之亡夫永嘉之亂又驗  
矣而渡江君臣猶不知以此相敬豈以風俗之敗非  
召亂之著者邪嗚呼迷哉而蔡氏出於其門獨能世

學好禮達而不污君子哉 宋文鑑

子昂畫洲明像贊

元 虞集

田園歸來涼風吹衣窈窕崎嶇遐踪遠微帝鄉莫期  
乘化以歸哲人之思千載不違 虞道園集

歸田圖贊

明 方孝孺

千祿非冒高蹈非矯趨舍進退由義與道孔明之度  
子房之英天厄其道非吾無能廬田崇崇其下江水  
清風穆然盛德之士 遜志齋集

陶元亮像贊 并序

明 侯恪

余生平仰止元亮先生殆慨然想見其為人歲辛



酉獲從元鎮所讀先生集壬戌復從元鎮所拜先生像又益慨然想見其人余不羈生平多所嗜好嘗種菊先生亦採菊東籬嘗飲酒先生亦期在必醉嘗學琴先生亦撫無絃琴自適嘗爲詩先生詩獨得古作者遺意以此仰止先生不一而足元鎮謂余當贊乃拜手稽首而爲之贊贊曰

出則五斗處則五柳中情澹然于世何有彈琴詠詩種菊飲酒我景維行吾師吾友

侯太史集

陶淵明贊

明趙皇梅

嗚呼陶公伊何人哉以爲隱耶而一縮彭澤之銅墨

以爲仕耶而終老潯陽之澤國以爲禪耶而不入廬山緇叟之社以爲玄耶而不掛漆園仙吏之縲蓋天之逸民聖之清節故以魁壘竒特之才而寄之于批抹風月以烟鬱偏反之襟而寓之于耽嗜麴蘖此千秋弔古之士往往與報韓之司徒復漢之武侯同稱爲振古之忠烈

讀明文會編

謝靈運小像贊

元虞集

文闕 虞道園集

謝靈運像贊

明王鏊

襟懷曠逸才氣桀驁鞭策曹劉凌轢顏鮑坦腹岳胡



露頂脫帽欲知其詩盍視其貌 王文恪公集

北齊驃騎大將軍高敖曹贊 并序

唐白居易

高昂字敖曹渤海蓆人也姿體甚異膽力過人累  
經戰伐皆著功績官至驃騎大將軍儀同三司冀  
州刺史其勇敢忠壯冠于一時稱為名將後竟以  
攻戰死於王事年四十八贈大尉諡曰忠武贊曰  
敖曹之容好配子羽生揚勲烈死諡忠武武不顧身  
忠不忘主誠哉選士無以貌取 白氏文集

隋司徒毘陵陳侯像贊 明唐順之

嗚呼奸雄欲發必先所忌其始或同終則必異文若  
于曹演芬于李雖暫相託卒繼以死法與初起寔附  
隋室侯與同事左提右挈匪沈是同維隋之故忽圖  
不軌中道乖悟一賊一臣勢豈兩並沈非殺侯則侯  
誅沈克數未盡侯卒就屠其身則亡義氣炳然雲頭  
墜矢聖所不言杜伯之事理蓋有為維侯精爽千載  
勿渝後有奸者視侯陰誅 唐荆川續集  
并序 明費家  
學莫先於立志志立矣則雖純疵異觀而皆有所  
究竟以成其業故吾夫子喜狂簡之徒而於自盡



者有戒焉王仲淹之生於隋獨立不汙汲汲以用  
世行道爲念欲比肩伊周則以太平十二策上陳  
不用即退而著書立言思以追夫孔孟之轍故其  
遺書如中說者至於今尚存朱子稱其循規蹈矩  
優於荀揚韓子程子謂其極有格言若是者非其  
志之有成乎嗚呼其不幸而不生于湯文之世其  
亦不幸而不遊于孔孟之門而未能有所遇以大  
成其志也愚讀其書思其人而不可見乃嘆而爲  
贊云贊曰  
嗚嗚偉人希世之珍天下之士三代之心獻璞不售

披衣帝閭遠紹遺緒講道河汾名蓋益彰道引而尊  
瑕莫掩瑜器則在身論其大蓋矯矯乎君子不變之  
強而豈淺淺小丈夫猥瑣之倫也哉 鍾石文集



贊海卷之八

Blank columns for text in the right page.

贊海卷之九

像

名賢

唐太子太師贈司空鄭國魏公贊并序

唐相鄭國魏公魏之曲城人也以命世之才逢不

世出之主專以仁義之道切磨規諫欲俾厥后坐

肩唐虞謂守文之難過於創業帝用其說不四三

年遂興太平較其大功不下房杜大名之學有鄉

賢堂益以故丞相文正王公忠愍冠公尚書忠定

賢堂益以故丞相文正王公忠愍冠公尚書忠定



張公侍郎王公崇儀柳公皆文武鉅賢出吾里中  
圖其儀形而尊祀之以起生徒之志誠盛事也然  
唐距本朝為最近若鄭公之德業閎大超然獨出  
得不為鄉賢之冠乎其可遺哉余求得其像建堂  
于宣聖殿之北鄉賢堂之南以完其美昔成覲曰  
彼大夫也我大夫也吾何畏彼哉今夫學者既得  
良師友朝夕講習開益以盡其善又觀所圖吾里  
之賢者隆名偉蹟卓然不泯之如此豈不思曰彼  
能之吾反不能哉亦在乎勉之而已系而為之贊  
曰

猗唐魏公相于太宗諫勇資育切摩上聰術則仁義  
道惟大中堯舜我后皇夔我躬遭會真主言行計從  
引金自况謂公良工以公喻鑑煥乎吉凶君如是聖  
臣如是忠宜不暮日亟成治功高視三代誰其比隆  
惟魏之學鄉賢是崇圖祀者五誠德之豐公實生魏  
羣賢之雄尊近遺遠教斯未克吾得公像載啟儒宮  
義一為勸禮增有容學者來視以嚴以恭高山景行  
衆發其蒙有美魏都大河注東如公之名滔然不窮

魏公集

狄梁公贊

明費寀



人孰無節遇蹇或易人孰無才處屯或塞武壘斯熾  
唐燼幾炮艱者莫全巧者先慝於身則損在國何益  
惟公偉人建此奇績外和內剛言婉理直不汚不皎  
匪諛匪激太險若夷至誠以格道不時徇人不我射  
幾以密成黨惟公植身既損館事中如的浴日之功  
補天之力邈矣高風千古遺則不有斯人其何能國

鍾石文集

韋負公贊

明宋濂

原武韋宗仁當天后政嚴之時獨以寬厚聞其弟  
守代州宗仁教以唾面自乾至今爲善者師焉因

贊之以自勗贊曰

我言之挑斯辱之招我行弗足我貽其辱二者無失  
其至由外內省不疚我則何罪我面彼唾乃彼之愆  
我何潔之正使自乾孰怨自來攘袂而闕孰量之弘  
受詬如頌是非苟繆不亦殆而微公之師吾誰與歸

宋學士集

張荊州畫贊

唐呂溫

中書令始興文獻公有唐之鯁亮臣也開元二十  
二年後玄宗春秋高矣以太平自致頗易天下綜  
覈稍怠推納寢廣君子小人摩肩于朝直聲遂寢



邪氣始勝中興之業衰焉公於是生人爲身社稷自任抗危言而無所避兼大節而不可奪小必諫大必諍攀帝檻歷天階犯雷霆之威不齊不止日月之蝕爲公却明虎而冠者不敢猛視羣賢倚賴天下仰息凜凜乎千載之望矣不虞天將啓幽薊之禍俾蒞臣衆蒙以速致戎詐成讒勝聖不能保褫我公袞寘于侯服身雖遠而諫愈切道旣塞而誠彌堅憂而不怨終老南國於戲功業見乎變而其變有二在否則通在秦則窮開元初天子新出艱難久憤荒政樂與羣下勵精致理於是乎有

否極之變姚宋坐而乘之舉爲時要動中上意天光照身宇宙在手勢若舟楫相得當洪流而鼓迅風崇朝萬里不足怪也開元末天子倦于勤而安其安高視穆清霽然大滿於是乎有泰極之變荆州起而扶之舉爲時害動拂上欲日與讒黨抗衡于交戟之中勢若微陽戰陰衝密雲而吐丹氣歛耀而滅又何歎乎所痛者逢一時事一聖踐其迹執其柄而有不可有成有不成况乎萑池草芽沈落光耀者復何言哉復何言哉曹溪沙門靈澈雖脫離世務而猶好正直得其圖像因以示予



觀而感之乃作銘曰

唐有棟臣往矣其逸世傳遺像以覺後覺德容恢異  
天骨峻擢波澄東溟日照太岳具瞻崇崇起敬起志  
貌與神會凜然生風氣蘊逆鱗色形匪躬當時曲直  
如在胷中鯁鱗初脫激海以化羊角中頽摩天而下  
無喜無愠亦如此畫嗚呼為臣傲爾夙夜呂衡州集

代唐玄宗贊曲江張氏九齡宋孝宗

鹿入深宮花解愁牛登高鼎鍊優休當時若聽履霜  
詔豈到峨眉山盡頭噫雖賞因奏薦而問公風度蒙  
大難而遣使祭餼不識噬臍禮意曲江何似荊州本別

曲江集附載

張曲江畫像贊并序唐庚

大觀四年冬吾南遷至曲江其故老為吾言唐開  
元中平盧帥張守珪遣偏將安祿山奏事京師張  
文獻公見之大驚密請除之不從未幾守珪入朝  
祿山引兵襲契丹大敗所亡失以萬計公請以軍  
法誅之又不從後二十年祿山稱兵犯順公之歿  
蓋十六年矣明皇奔蜀始悔不用公言於是遣使  
度嶺帛祭以薦史驗之良然吾嘗謂明皇一日殺  
三庶人如刈竹葺如剖瓜瓠無毫髮顧惜而誅一



胡維若拔齒然此何理也方是時唐祚將衰親疎  
厚薄之序一切倒置陵夷至於天寶之末人倫天  
理滅絕敗壞張垆其壻也而先叛永王其子也又  
叛太子起兵靈武則又叛雖微祿山唐祚未必不  
衰而唐祚之衰自祿山始明皇嘗嘆公歿朕不復  
聞忠言正使公存吾知其言不復用矣公平生論  
事至多而斯言不用尤可痛恨吾欲訪其故居而  
弔其墓識其子孫以求其遺風餘烈時方遽乍勢  
有所未暇獨得其遺像流涕而贊之曰  
魏武言典午不可親而文帝待之坦然不疑也齊王

攸言胡維不可養而晉武寵之確然不移也莫親於  
父子莫愛於兄弟一有所蔽則親愛莫得而奪之况  
於疎遠乎然則公言之不用固其宜也噫先事則未  
信已事而悔則無及前世之敗未有不由斯也可勝  
道哉可勝痛哉此吾所以見公之像慨然而咨嗟也

唐眉山全集

張曲江遺像贊

明文徵明

是為唐相曲江張公之像憲副浴南陳君紹儒其  
鄉人也歎其名德常挾以自隨比奉使吳門出以  
相示俾余為之贊



於戲張公半儀醞籍意氣崢嶸文章爾雅志節公清  
郊祀之疏早已占其卓識金境之錄益以見其忠貞  
羞仙客爲比惟其正識祿山之逆惟其明此所謂有  
唐之賢相此所謂南海之精英昔嘗閱其事業於編  
簡今獲瞻其風度於丹青是誠無愧爲千古之名德  
宜其爲鄉後學之所儀刑也 甫田集

元德秀贊

明馮時可

卓矣紫芝天質不飾負親應舉千里頌頌母也云亡  
廬倚窀穸食却鹽醯藉去茵蓆薄宦如隱絕婚如釋  
人曰不可柰爾宗初公矢靡他二親罔覲乾坤萬彙

寧獨七尺伯氏而胤誰非先澤猶子其孤迺乳迺恤  
精感昊穹漣流能食往令魯山虎暴於陌有繫者盜  
奮臂請捨吏爭諫止去而孰獲公則已許不以累易  
盜果尸虎舉邑太息東都太師銅籠畫闕縣令刺史  
陳樂獻劇錦繡陸離犀象烜赫有工儼然聯袂跼蹐  
雅歌于薦帝爲夷憚賢人之言其旨奕奕歲滿而遷  
一縑雙屐陸渾佳勝肥遯自適不圉而裝不垣而宅  
彈琴自娛蕭然晨夕攜榼者來酣飲無擇或肆於古  
而爲詞伯賦寢幽懷頌武雄識吁其高矣豈世所測  
或狂或狷亦孔亦翟宦則爲游處亦爲容物外無營



方中有得酒龍文豹聊見其迹

馮元成集

孔璋贊有序

明方孝儒

所貴乎天下者非謂兵甲之多玉帛之富擅海內  
之口擁百萬之師無術以守之而至於敗亡者衆  
矣天下安恃乎此蓋人之羣居必有其望百人聚  
則兵聞之不止一人叱之即愧怍謝罪而引退者此  
必人之所望也欲服天下之心者必先求天下之  
望而尊之所慕愛敬屬欲俎豆之而不可得者口  
口立朝廷則民焉有不歸者乎故周之興也以伯  
夷高光之興也以得張子房卓茂而賓師之武帝

亦有汲黯諸侯惴畏而不敢叛代宗相楊綰唐幾中  
興斯歎君子者其容貌非動人才力非能與舉旗  
斬將者角然而聞其風烈奔走順從惟恐不得觀  
其輝光者德弘于中聲名著于當世有非才藝之  
士所及也故一才一藝治功可稱者可以有可以  
無而名德為四海望者國家興替之所繫也唐氏  
寶之亂世皆咎其不用張九齡信矣然吾觀是時  
有名之士如李憲泰和亦一世望也而玄宗不能  
容之所信任者皆小人之尤聞之可為凜凜而玄  
宗不悟是豈特足以失國而已哉殃不逮其身則



幸也當泰和之被繫張說輩皆擠搆之欲致之死  
而布衣孔璋獨上書請以身代璋信奇士乎而唐  
之君臣爲可愧矣國不惜才而使布衣惜之斯世  
果何如也吾感璋之義讀其疏而爲之泣下曰玄  
宗之治不足觀矣賴有孔璋耳作孔璋贊其詞曰  
世有英傑生民之望國能尊之天下可王如海如河  
魚龍所依旣據其依孰不畢來唐李泰和亦天下士  
胡不存之欲寘之死天將亡唐故褫其魄人望旣隕  
唐幾不國我謂玄宗不若孔璋義聲泚泚暴于四方  
布衣愛士而國惡之我思孔璋孰知我悲遜志齋集

權舉贊

明馮時可

嗚呼公之佯死以避祿山之署而免其親也孝而忠  
乎公之詭名以逃永王之脅而免其身也忠而智乎  
迨其後也一辭起居一辭著作終身不仕而曰吾潔  
吾身以全吾志不欲以吾君吾親爲吾名也嗚呼其  
忠孝之至而智之大者乎彼夫小智之士以忠漁利  
以孝獵名沾沾而自負者聞先生之風寧不自愧其  
非夫馮元成集

李太白像贊

明宋濂

元行臺治書侍御史亦憐真班所藏李太白像



秘閣傳本吾友危君太樸嘗爲之贊自後流落  
金陵賂氏酒家洪武己酉秋郎士王宗溥購獲之  
北尋以摹本見貺因造贊曰

長庚降精下爲列僊陵厲日月呼翕風烟錦衣玉顏  
揮毫帝前氣吞閣豎視若烏鳶頓挫萬象隨機回旋  
金童來迎絳節翠壇下土穢濁孰堪後先鞞然一笑  
騎鯨上天 宋學士集

李太白贊

明方孝儒

唐治旣極氣鬱弗舒乃生人豪波天之奇矯矯李公  
雄蓋一世麟游龍驤不可控制糝糠萬物甕蓋乾坤

狂呼怒叱日月爲奔或入金門或登玉臺東遊滄海  
西歷夜郎心觸化機噴珠湧瑛翰墨所在百靈護持  
此氣之充無上無下安能瞑目開於黃土手持長鯨  
鞭之如羊至於扶桑飛騰帝鄉惟昔戰國其豪莊周  
公生雖後斯文可侔彼何小儒氣餒如鬼仰瞻英風  
猶虎與鼠斯文之雄實以氣充後有作者尚視于公  
遜志齋集

杜甫贊

宋狄遵度

先生甫名其字子美其祖審言當景龍際以詩自名  
高視一世殆子美生其作愈偉少而不羈跌宕從



大章短篇純乎首尾詩派之別源遠乎哉波流法  
乃自我回躡崑崙巖足亂四溟醜縷蛤蚺拘致鯨  
蜿蜒委瑣巨細雜并一吸則已不圖其羸橫放直出  
說色互端排蕩摧憂措齒不安鬼求於陰神索于陽  
鈎搜措莫色沮氣傷閃形撇影隱露藏蔽彈變極態  
惟厥所指吾方瞪踞初不用意沃粹醇源植根塊口  
貫赫昏庭盤燧人圍經亘聯屬百億萬古芬釀雜襲  
纖細委墜哺吸蹈藉羣推走死嗚呼子美之述吾能  
誦之子美之意吾能知之其所未聞其所未知蓋未  
得其云爲宋文鑑

郭令公像贊

明劉定之

唐尚父太尉中書令邠陽王姓郭氏其元勳偉烈  
若干社稷豈獨其身爲國宗臣而牟裕子孫百世  
賴之余從其裔孫獲觀遺像乃知將相自有真也  
韓退之所謂如高山鉅谷龍虎變化蓋其麾下偏  
裨頤指氣使者尚然而况於王乎爲作贊曰

唐室中微主昏臣僭長驅腥膻摧裂宇縣青騾蜀道  
龍種路隅嗣皇朔野號召烝徒風飛雷厲英雄群集  
孰若汾陽其聲赫奕躬扶日馭午揮天戈光弼懷恩  
左翼右呵蕩滌咸維勦滅安史盡挈寰海歸唐天



歷爾代德常爲虎臣功名益代貴富超倫入于其  
綺疏朱戶侯伯僕隸妃主女婦立于其朝真王上公  
強藩屈膝奸相歛容出于其郊貝冑金錢回紇羅拜  
吐藩奔北唯茲汾陽何福之隆本于厥心全德大忠  
厥心何見其儀孔碩河目海口泰華屹立宜爾儉全  
匍匐赳赳鬼貌藍色狐遇於菟十世宥之尚百其世  
凜乎猶生遐哉勿昏明文徵

顏魯公贊

宋 劉宰

學爲孔子學爲孟軻書非聖而不讀道適正而靡他  
見危而怵懦夫孔多公有遺文簡編錯落氣雖勁正

而學則駁降衷秉彛固非外鑠見義而前萬牛莫曳  
論功于唐於公爲細以迄于今天地奠位世方怡愉  
堯言舜趨利害毫髮局縮駟人禍可逃天刑爾誅  
勿怖於死擇善不審公則死矣生氣凜凜死生倏頃  
勿謂不聞公則死矣萬世清芬我贊公像匪公之爲  
毋貳爾心以警有位漫塘文集

唐陸宣公贊

明 李默

文淵 犀玉槎稿

李西平畫贊

蘇軾

以吾觀西平王提孤軍自北方起行在走懷光斬



此如反掌及其後帥鳳翔與隴右瞰河湟兵益振  
既滅終不能取尋常墮賊計因平涼卒罷兵仆三將  
誰之咎在廟堂斬馬劍誅延賞為菹醢不足償覽遺  
像涕泗滂沱疎坡全集

裴晉公畫像贊并序

宋 文彥博

尚書良武功蘇才翁得裴晉公畫像於太資政富  
公口口家藏舊本正類因以相示予嘗讀裴公自  
題寫真贊有靈臺莫狀之句意公負其所蘊謙不  
自言俟他人發明之而當時多嫉公勲德或云平  
蔡者愬公何與焉又逢吉黨謬為謠言以傾公獨

賴正人訟其誣枉僅免於禍雖宗閔逆出其門猶  
憾不引為相擠公于梁則於其時孰昔揚公之瑜  
後世史官於公無嫌追書公美近平實錄噫豈辟  
邪醜正見抑於當時耶將貴遠賤近人之常情耶  
予仰公之風親公之像因原公意輒續公贊

繪事雖巧傳神寫照公之靈臺孰觀其妙靈臺崇崇  
含和處中經始勿亟積善累功賢人之業伏羲資忠  
人不吾譽吾不為沮人不吾毀吾不為喜竊揆公意  
如是而已文潞公集

韓退之贊

明 胡儼



六經之文孔孟之道特立獨行旁搜遠紹權深浩  
莫窺其涯守正不回斗山巍巍

文翰大成

韓文公贊

明馮時可

文公出為潮州刺史潮人未知學公乃牒諸縣各  
置鄉校令歌鹿鳴諸詩行鄉飲酒禮以示之又命  
秀才趙德講經術正句讀潮自此文學彬彬與中  
土比贊曰

惟公之學本諸孔氏起衰濟溺持論無諛出刺於潮  
教化首事潮本海涯其民懍怯闇塞不宜譬彼魍魅  
公為設校立師陳義大曜懸天煥然有責瘴解氛消

風殊氣異易稱有孚惟此心志聲應如鶴化馳若駟  
室鏞一時俎豆百世

馮元成集

蘇子瞻玄英處士方公遺像贊

明宋濂

予學子方孝孺玄英處士之諸孫也持處士像來  
請贊贊曰

振駘雅於江南混漁樵於玉笥諫垣天近雖虛彤州  
牧之童牛衣夜寒終不奪煙霞之志凜然允直之風  
可折諂諛之氣導真曜之遺則造玄英之私謚唯其  
畜厚而發弘所以繼隆而傳熾紳笏蟬聯勳庸赫著  
蔓延閩浙之間莫匪雲原之裔敢申贊辭式昭瞻



宋學士集

唐福州軍事判官章公倫實檢校長傳仔鈞之父

也其遺像至今蓋四百餘年矣二十世孫御史中

丞丞溢偶於閩中購得之如獲至寶持以示其友宋

濂因為作贊贊曰

器局深沉容儀嚴肅吁嗟哲人如金如玉餘慶所被

孫子若雲重珪疊組至今揚芬

宋學士集

韓魏公贊

明章懋

昔宋昭陵有臣魏國可屬大事重厚如勃允武允文

有才有德入司諫垣闕補袞職出司邊寄瞻寒西賊

執政三朝惟公是式定策受遺手扶紅日天下晏然

泰山磐石身係安危國同休戚豐功盛烈鼎彝是勒

於千萬年有赫奕奕

韓魏公真贊

并序

明費宗

孔子曰所謂大臣者以道事君不可則止夫君子

之仕也行其義也豈以必去留為尚哉然則心之

所存功名富貴舉莫能係由是發諸勲烈自然光

明俊偉益美在其中而暢於四肢發於事業此固

然之宜然者也有一干斯而患得患失之心先



其內則雖有所建立不過因陋就簡隨時上下以  
補塞其罅漏而已尚何望其休光之著於當時而  
傳於後世者哉魏國忠獻韓公之仕于宋豐功偉  
績不一而足嘗觀其荅或人云臣當盡力事君生  
死以之顧事之是非何如其至於成敗天也豈可  
豫憂其不成遂輟而不為哉由是觀之則其心所  
不能累者不特功名富貴而已也故其歷事三帝  
定冊兩朝知無不言言無不盡其始也甘就荒庫  
之滯前後封疏七十餘上論者服其切而不迂既  
而兩宮有隙乃從容感勸不動聲色而措天下於

泰山之安及夫嘉祐之末英廟不豫為之再定儲  
二以安社稷天下賴之其聲望之在當時西賊有  
破膽之謠遠人慕之至欲圖其像貌論者比之伊  
周方之益契公之功業顧不偉且盛哉至王陶一  
刻則堅辭政府安石再沮則終判相州浩然莫之  
挽而留也合則留不合則去大臣之義魏公有之  
愚讀公之傳久矣間者觀公之像英風偉烈百代  
如見願為執鞭而不可得乃拜而為贊云  
堂堂魏公維國之符雲見而出星殞而殂聞公之言  
識公之心事惟其是奮不顧身兩宮有嫌從容勸



孝慈天性讒莫能移再定大策功高位并兼哲撫  
有終無成才無文武名著華夷為國老成如龜如  
一朝求外完壁而歸公之榮矣靈國之媒瞻拜公像  
敬仰深深沮之者誰心腐顏頰 鍾石文集

范文正公真贊

宋 閻灝

英英如神巖巖如山仁義道德益於顏間大忠臯夔  
元功方召以贊中謳以尊嚴廟佑我仁祖格于皇天  
是肅是虔不傾不窩維慶有祠邦民瞻思慶山可夷  
茲堂巍巍 范文正公集附載

范文正公真贊

金 元好問

文正范公在布衣為名士在州縣為能吏在邊境  
為名將在朝廷則又孔子之所謂大臣者求之千  
百年之間蓋不一二見非但為一代宗臣而已丁  
酉四月獲拜公像於其七世孫道士園曦乃為之  
贊云  
以將則視管樂為不忝以相則方韓富為有餘其忠  
可以支傾朝而寄未命其量可以際圓蓋而播方輿  
朱衣玄冠珮玉舒徐見於丹青英風凜如古之所謂  
岳紳正笏不動聲氣而措天下於泰山之安者其表  
固如足歎 連山集



宋龍圖閣學士范公畫像贊

明 李夢陽

予觀范龍圖則人其人嘉其志觀龍圖出處則表  
其時予過無錫秦氏獲觀其畫像我冠法服莊嚴  
弘毅蓋得其彷彿焉則又識人心不泯不然即顧  
兵更生安所置毫哉予生長環慶間與故老談龍  
圖扼元昊事雖古名將何加矣於是薰沐再拜贊  
曰

有偉一人清明令儀三代遺方百世之師空同集

富鄭公畫像贊

宋 李綱

契丹自澶淵之役通好守約不悞盜邊至慶曆間

以我方用師西鄙且厭兵因聚重兵境上遣使來  
聘欲求關南故地中外震懼是時富公受命報聘  
既見虜主為陳通好則人主專其利而臣下無所  
獲用兵則利歸臣下而人主任其禍虜主感悟因  
許增歲幣而契丹平北方至今無事其後河朔大  
水民流京東公時知青州兼京東路安撫使擇  
所部豐稔者五州勸民出粟益官廩以賑濟之得  
公私廬舍十餘萬區散處其人凡治五十餘萬衆  
立法簡便天下至今法之惟公以制科中第歷諫  
官侍從以至宰相危言直節以道進退勲業甚茂



然功在社稷德在生民此二事爲最予嘗讀公諫  
垣集奉使錄慨然想見其風采及來沙陽見公繪  
像於羅疇老家命工傳寫且爲之贊庶幾日瞻儀  
刑以慰慕仰之心焉其辭曰  
天下達德惟仁智勇合之成體散之致用出丞富公  
備此三德直道不回以相王國其智伊何見於使虜  
敷陳利害以悟其主歡盟至今莫敢予侮其仁伊何  
見於救災饑民如雲襁負以偕法簡思周垂訓將來  
何以行茲斷以勇克衆人所懼公獨不惑奪虜之氣  
厲色折之賑民之饑誠意治之我生後公今覲厥像

丹青載傳朝夕是仰

李忠定公文集

宋 楊萬里

景東畫文潞公像陳勉之攜來求贊某贊曰

俾宋作古自我仁祖心一德同潞國文公不兵不革

正是顏色式是中國震是戎狄有頽者冠忽然在前

喜有人焉馬知九原誠齋集

司馬溫公贊

明 錢福

連茹拔茅維公在朝青苗保馬維公在野公之再入  
旋乾轉坤重覩慶曆公之云亡陰凝冰堅馴致靖康  
嗚呼悲哉誠竭于已命屬于天若祚宋蜀爲其然



明文徵

少師文定公南豐先生遺像贊

昔歲父子有功仲尼世德中蝕至公重輝絕學之後

踐履精思主盟斯文上追唐虞噫實命世之宏材不

待文王而興者與元豐類藁附載

劉原父遺像贊元虞集

博學洽聞雅言通史殘經禮軼折衷補礙百煉懸鑑

照物不遺末世寡陋爾瞻遐思雲道園集

劉貢父遺像贊前人

兄弟並興博雅冠代著書滿家積穀之最守道白如

不局曲迂精神所存天祿石渠同上

東坡像贊宋 陸游

我遊鈞天帝之所都是老先生玉色敷腴顧我而歎

閱世垢濁笑謂侍僊昇以靈藥稽首徑歸萬里天風

碧山巉然月墮江空澗南集 樓鑰

出則鳳鳴處則龍臥論議觸海翻聲名塞天破百論

九死一毫不挫嗚呼固已知前無古人後有作者殆

恐無有過之者也玫瑰集



東坡畫像贊

竹岩家藏

宋釋居簡

帝哀先生為天下忌，逮及其轅卒，不怒遺，遂騎箕尾而分天章雲漢，昭回衣被八荒。載駟六丁，收拾文字，神京遐陬，旁羅曲致，落人間者，太山毫芒，寒者綺紉，餒者稻粱，取彼諧人，勿畀豺虎。既梁其饌，而紉其袴，豢以人爵，俾歛厥修，息公之譖，承天之休。北碕文集

東坡小像贊

宋高啓

明高啓

或置諸鑿坡玉堂，或放之朱崖黃岡，衆皆謂先生之憾，余則謂先生之常。先生蓋進不淫，退不傷，凌厲萬古，麾斥八荒，而大肆其文章者也。高季迪集

東坡笠屐圖贊

明王鏊

長公天仙謫墮人界，人界不容公氣，逾邁作之杭州。吾同以遊，披之赤壁，吾用以適瓊崖，儂耳鯨波汗漫。乘桴之游，平生奇觀，金蓮玉帶，曰維東坡。戴笠著屐，亦維東坡。出入諸黎，負瓢行歌，十惇百卞，其如予何。其如予何。王文恪公集

東坡笠屐圖贊

有叙

明

陳繼儒

東坡先生居儂耳，曾於雨中着蓑笠，過黎秀才，因流傳此圖。比時遊戲中，極有感慨。余拈出作偈，贊首以贊曰：



問汝無風無雨何為戴笠披蓑不是喬粧打扮曾經  
西地風波白石焦真稿

崔伯易畫像贊

宋陸游

崔公名公度字伯易高郵人劉相沆舉賢良方正  
不赴以仕為三班差使韓魏公薦之詔易文寶為  
國子監直講亦辭元祐中再召為郎又皆固辭補  
外郎諸公力白於朝強超為國子司業訖不肯復  
出為郡以起居郎祕書少監召亦不肯起紹聖中  
復以為祕書少監辭如初遂請官觀尋致仕予喜  
其白首一節乃求畫像於高郵而為贊曰

古之君子學以為已可行則行可止則止仕以行義  
止以遠耻世衰道微豈復知此蚩蚩始學青紫思拾  
萬馬竝馳孰能獨立始雖弗急後亦汲汲我思崔公  
涕泗橫集瑞南集

宗忠簡公畫像贊

明吳伯宗

公之力足以旋乾而轉坤公之功足以攘夷而安夏  
始以一言能返北旆而南還後以二十四年不能回  
南轅而北駕且留鑰之任方切而巧言遽入於帝聰  
渡河之志未酬而大星已殞于中夜何人之于公則  
知媚嫉而天之於公則不知假借此有志之士百世



之下所以想英風而激昂拜遺像而悲咤也

臺館鴻

宋禮部尚書黃公像贊

北宋禮部尚書黃公之像也明太子洗馬四明晚

生楊守陳獲拜焉若觀景星瞻喬嶽謹論其世而

贊曰

黃公度名文叔其字擢科宰邑累遷御史疏請光宗  
朝重華宮盡逐讒宦者時弗能從遂棄厥官歸新昌  
山中起為右正言將論韓侂胄之蔽御筆與即竟奉  
祠還入偽學之籍名垂不刊召副太常游權吏侍出  
典兩郡溥仁洋惠活百萬口翳桑之餓人全九萬家

潢池之赤子裁決訟牒日午特緒餘耳入直寶謨日  
推轂士曰何報國庶其在北請光至十不允陟禮部  
尚書論藝祖乘萬世之統在純用儒生與務惜民力  
其主曰俞謝病提舉萬壽卒贈龍圖史所謂始終一  
節合古之遺直治民忠厚侔古之遺愛公其魚乎

銘公桂坊稿

杜士賢贊有序

明方孝儒

宋理宗景定五年秋彗出柳詔求言東陽杜希聖  
時為武學生上疏誣奸臣賈似道請正其罪以消  
天變天下壯之後百年其曾孫寔以疏草示余余



讀而歎曰嗚呼當危亂之時而士君子肯忘其身  
而爲之言布衣之微斥其信任大臣而不諱上下  
交盡其道是皆三代以降之所無而後世所當取  
法者也爲贊以附其左方贊曰  
天下之故猶人一身血沮氣窒不名爲人君臣豎民  
以情相繫情或不通瓦解河潰維聖迪哲察于人言  
虛已旁求惟恐不聞天之從違於此告之邦之興亡  
於此占之聞人之言有若天命人豈知天不敢自聖  
宋初諸宗嗜諫若飴風俗丕隆如三代時迨其將衰  
奸兇擅國國不遽亡繫諫之力惟時杜君奮不有身

持書叩閣以擊權臣言雖不行肝膽幾落直氣凜然

可撼山嶽居非御史居非公卿憂國而言卒以直名

孰居其官而遺其事起若九京吾爲君御遜志齋集

合溪黃進士百一府君畫像贊

明鄭楷

猗與黃公南宋進士科名陸離世敦詩禮源深流長  
群從如雲支分派別文行聿遵歲時之嘉合祠祭享  
陳設豆籩敬懸公像雲仍塾塾小大畢來肅容瞻仰  
俯伏庭階薦奠口事升堂聚會曰長曰幼次第展拜  
拜畢者坐獻酬有儀和樂且湛歲守常規由宋迄今



引而勿替孝子不匱永錫爾類鄉閭取式郡邑稱揚  
尊祖敬宗福祿是康義門奕葉文

新修文文山像贊  
明于謙

嗚呼文山遭宋之季狗國忘身舍生取義氣吞寰宇  
震撼天地陵谷變遷世殊事異坐臥小閤囚于羈繫  
正色直詞久而愈勵難欺者心可畏者天寧正而斃  
弗苟而全南面再拜含咲九原孤忠大節萬古攸傳  
載觀遺像清風凜然明文徵

文丞相像贊  
明孫燧

偉哉文公千古之士方國脉尚存也流離顛沛唯恐

不得其生及國脉既絕也慷慨從容唯恐不得其死  
求生匪生求死匪死生死惟求成就一是丈夫事業  
固每如此百世聞風孰不興起同上

陸秀夫像贊  
明宋濂

身抱龍髯兮眼不見水鳳闕雖遐兮龍堂則邇玉璽  
皦如兮肯汚泥滓赤日出海兮爾心不死宋學士集

王炎午贊  
明馮時可

王炎午舊名鼎翁別號梅邊晚改名炎午以鼎翁  
字世居廬陵汝源里補太學生個儻有志每談忠  
臣義士死生牢愁即目光上竄直髮如樹慷慨流



涕疑欲之者隨丞相文公天祥遊丞相走閩中募  
兵勤王炎午謁軍門上方畧千言斐亶可聽以母  
老父沒辭不受職及丞相被執過廬陵炎午心疑  
之作生祭丞相文繕寫數百本自贛至洪驛徒水  
步山塙店壁貼之冀丞相經過一見後丞相死燕  
京骨歸里炎午北向再拜哭曰丞相得矣復操戈  
死祭之矣午悼宋亡終身不仕事母三十年不懈  
母亡廬墓偶以喪事入邑城一婢拔燭穗遺像及  
面感母見夢自足趾不離墓以迄於終所著有吾  
汶集余嘗讀其二祭文令人勃勃生雄氣也為之

贊贊曰

天地牟刺獎翼封豕薦食上國趙帝南徙丞相勤王  
廣集蘭錡惟公子然輸丹懷芷不受一官龍蛇蓬累  
葬父養母蕭然槐里丞相被執北驅燕市良明永嘆  
閉戶可矣朱家人奴田客國士咸非我園草莽宜爾  
大運已終誰能傾否丞相從容尚戴髮齒公如納溝  
且疑且耻操觚千言明誼陳理西山有薇汨羅有水  
用以生祭祈速其死丞相骨歸不愁而喜雪霜松栢  
始用褒美嗟乎人生成就一是鹽梅相和玉石相砥  
以死贈人乃真知己三十餘年戶無移趾葬母廬原



終身哀毀忠能勗人孝以自履兵汝有集氣不靡靡  
石代雖遙九原若起星垂日懸高山仰止

馮元成集

謝疊山先生像贊

明王鏊

噫古帝王自立中國元為長蛇吞噬罔極四海奔潰  
左衽魑結時維信國洎我疊山奮不顧身障彼狂瀾  
公身可殺公義莫口至今耿耿光耀日月視彼奸佞  
醜顏穹廬與公所得孰少孰多袍笏履約神物呵守  
公應不亡公其有後

王文恪公集

卷一

謝疊山先生

謝翱贊

有序

馮時可

明

馮時可

明

馮時可

明

謝翱字臯羽建寧人幼以孝稱屢試進士不第去

官而攻古文詞元兵入宋文丞相走閩倡義勤王翱  
家故溫傾資斧率鄉兵數百人赴難遂參軍事丞  
相被執翱匿民間流離久之間行抵勾越越多大  
江族而王監簿諸人招墨客賦咏翱混迹其間人不  
知為丞相客也然私念久不去人且覺而箝我於  
市矣去與吳思齊同依浦陽江方鳳方亦俠士也  
居無變志翱嘗東臨大海上會稽望宋家諸陵輒  
歎欷流涕晚愛睦州山水浮七里瀨登子陵釣臺  
北向舉酒哭而歌歌已復失聲哭側視者莫詰其  
誰何惟鳳與思齊心悲之翱自為西臺慟哭記所



叙與玉帶生張孟兼馮桂芳及思齊遊覽事皆丞  
相容也釣臺南有白雲源翻率其徒遊焉願卽此  
爲葬地又六歲居錢塘病革語其妻曰必以骨歸  
方鳳鳳心不負白雲約也鳳如其言葬之所著有  
晞髮集余嘗於粵西張羽之所見之其西臺記足  
當麥秀黍離真可涕淚千古爲之贊贊曰  
五坡戰罷天荒地絕丞相身羈詞人心折四顧途窮  
狼筈狐穴謝公問關行振勾越右族相依高咏自揭  
家已費散所存一舌久留奚爲且虞縲紲去之浦陽  
有士相挈主爲方鳳慷慨口節三人對處歔嗚咽

仰天背橫蹈地肝熱口走大海風塵整躡宋家一坏  
殘照遺碣雙淚作漿無聲有血還至睦州山周水洲  
巖祠依然兩臺嵒嶽舉酒長號視者莫詰四客泣哀  
嶷嶷切切丞相一去燕塵作屑東山來雲西州回轍  
泔浥寒林悲風愁雲冥歌阮哭千載聲闕主不刀環  
國如金玦壯士有心吐虹啼鳩豈其兒女感無家別  
馮元成選集

故宋汪古逸先生像贊

明程敏政

巍巍風度肅肅衣巾身元心宋維古逸民清絕之詞  
高潔之行丹青炳然敢不起敬堂墩文粹



南稜王先生像贊有序

明方孝儒

士習之盛衰豈不繫乎世哉世之生士猶地之生木柯葉碩茂而花實盛美者必非瘠土之所能有也余觀其宋考其政教文章之懿而求士於其時其大者既皆博覽多識宏偉而端亮其隱約而不顯者亦多忠信敦慤方介嚴重望其威儀聽其論議莫不偉然有以異於人此豈士之素賢哉師友之際禮義之習有以成之也烏傷南稜王先生威仲生於宋季而老于元余不及識其人而嘗聞其家求其遺事詢其鄉之耆老以考其行已之大方

蓋直諒剛嚴之君子而非今世之士所能及也揚子雲曰周之士也貴秦之士也賤周秦之相遠士未必皆以之而貴且賤也然不隨世而變者鮮矣安能不以之而異乎先生弟子最顯者為黃文獻公潛仕元為學者所宗而先生之孫翰林待制禕以文學事今上有名當世觀於先生可以識宋之盛觀於文獻公與待制君亦可以知先生之德矣

贊曰

欲知其身視其所處之世欲知其學視其所傳之人欲知其德之厚薄曷不觀於子孫吾以是知先生宋







尊聞行知若親 摠衣寒泉之糜 張皇幽眇 釐析毫絲  
如臯陶淑問 畢其情辭 如后羿注矢 不失其馳 既入  
閭域 遂升堂基 橫經曾監 矜佩鋸如祛 其人私牖其  
天 彛釋其偏岐 挽其九衢 德成財達 昭用如時 黼黻  
帝治 甄陶泰熙 明體適用 公實庶幾 無德弗報 四海  
祝尸嗚呼 許公百世之師 同上

吳草廬先生贊

前人

紫氣蟬聯神物 蜿蜒有開必先 山川降神自元而貞  
篤生哲人 慎斯勤斯 絕乎等夷 於道早知 厲如秋霜  
煦如春陽 何德之昌 抱膝而居 氣蓋八區 闕而弗舒

玩心神明 操觚弗停 輿衛聖經 學徒是依 毛之有麒  
甲之有龜 斟其淵冲 以消吝封 心熙氣融 大明當軒  
留聘益尊 施教成均 比許南吳 先後合符 人文之敷  
大明太史金華宋濂贊 同上

趙子昂像贊

前人

文運中微 頽波日靡 公起東南 作天一柱 天人之表  
帝王之孫 麟游鳳翔 珠明璧溫 歷試中外 遂居禁密  
其名之升 與日同出 彼儉邪者 腐鼠敗豚 何能病公  
臭穢自聞 三百年間 西東萬里 雄鳴一代 如公者幾  
公貌如玉 公文如金 變化莫測 照耀古今 同上



趙使君像贊

前人

宋之王孫元之循吏才優識明政通民治未老而歸  
臨難不貳懦夫觀之可以作氣

同上

虞文靖公像贊

前人

朱明之墟離火降精也丹鳥襪襪為駕絲軒也手握  
化樞人文昭明也補帝衮衣五色熒熒也上凌霄漢  
下燭九溟也無幽不啓無芳不榮也頓挫萬彙配合  
三靈也獨騎元氣棲神窈冥也之死弗沒隨物流形  
也凝為喬雲燦為德星也琬琰所勒鬼秘神扃也命  
世之材一代之英也

同上

虞先生戴笠圖贊

明王禕

猗文靖公青城山樵繼百年之學術擅一代之文豪  
當其舒英揚翹際乎熙朝紬書東壁之府載筆西清  
之曹摘天藻以洒翰擷宮錦而為袍雖方朔金馬之  
避世太白金臺之應詔曾何足儷峻而聳高及其挂  
冠神武返乎林臯竹簟茅屋之間曠葛巾野服之逍  
遙病臥秋風日著茂陵之稿行歌春夢時携僮耳之  
瓢睨八極而志隘曠千載而神超蓋其進也負道義  
如丘山其退也等富貴猶毫毛百世之下覩茲遺像  
亦可想見其風標也已

王忠文公集



先師內翰柳公真贊

明 宋濂

偉貌長身端嚴若神即而就之煦然春溫海濶天高  
莫窺覘其宏度霆奔飈豎豈驅駕乎雄文來趨踏之  
衿佩作儀表於薦紳出入容臺振百年之禮樂昭宣  
帝制煥大號於乾坤惟其具該博崇深之學所以繼  
光明俊偉之倫仰瞻遺像有涕沾巾儻使泉臺之可  
作庶幾士俗之還淳 宋學士集

鐵崖先生贊

有序

明 馮時可

先生姓楊名維楨廉夫其字漢太尉震裔自五季  
時居會稽父宏知瑞安州封會稽男母李氏有妊

夢月中金錢墮懷翼日公生稍長性穎悟日記數  
千言父期以重器弱冠不為授室築萬卷樓鐵崖  
山中使讀書去其榜輓轡傳食久之俾游學甬東  
粥良馬益裝公節縮諸費購黃氏羣書以歸父懼  
曰此顧不多於良馬耶泰定丁卯擢進士第署天  
台尹天台吏多黠有八鵬號公汰其最姦者卒為  
吏中免官久之改錢清場鹽司令鹽賦病民公白  
其事行中書弗聽頓首涕泣至投印公乃獲減額  
俸丁外內艱結廬桐原有酌墓者植竹筇於地筇  
發蘂牙枝葉鬱如人以為孝感起服久不調放浪



錢塘與道士張雨遊西湖南山窮歲為樂會有詔  
修遼金宋史公作正統辨千言大司徒歐陽玄讀  
而奇之將引置近列有尼之者公遂去吳興會華  
亭大姓呂翁延于家誨子弟遂居華亭久之除杭  
州四務提舉職事最劇公日夜爬梳塵滿衣襟不  
敢自逸轉總管府推官精訊獄鈎摘隱伏民稱不  
冤升江西儒學提舉未上汝穎兵起辟地富春山  
依元帥劉九九劉敗挈家歸錢塘居甚困嘯歌自  
若張士誠知其名召之不往士誠復使其弟來以  
幣聘公返之復書斥其六罪公復上書元丞相帖

木兒謫其貪賄養亂丞相惡之公遂歸華亭受業  
益衆洪武二年聘至京師修纂公不樂仕詠買妾  
詩云買妾千黃金許身不許心使君自有婦夜夜  
白頭吟僅百日稱肺疾歸未幾卒年七十有六方  
病革謂左右吾欲觀化一巡即撰歸全堂記頌刻  
而就擲筆曰九華伯潘君招我車馬俟久乃逃侍  
者聞數百人登樓步履聲相接守林公凌出贊葬  
之余山東楚與陸居仁錢惟善稱三高士墓公  
松於百花潭上考樂稱小蓬萊示不忘越也別有  
柱頰樓草玄閣公嘗燕坐臺上客至不下臺迎每



就見之相與高談大噱或出挑核盃酌酒酒半取  
鐵笛作長短弄傍若無人遇天爽氣清必踟躕登山  
或泛舟三泖出必以歌兒舞女從無日無賓賓至  
無不沉醉而公獨醒然或令侍兒出歌白雲詞公  
自吹笙和之公於文非先秦兩漢弗學議者曰  
曰商周彝鼎雲雷成文而寒芒橫逸於詩震蕩凌  
厲晚節較殷盛唐聲譽籍甚投贄乞文坐無虛席  
崖鑄野刻布列東南顧行甚博厚無文士浮薄習  
初聘錢氏忽遭惡疾錢父母請罷婚公卒娶之錢  
疾守愈黥奴負金度無以償詐為收券公不之詰

貴遊子流落客公家竊古名畫公曰我與之往  
達官為贄非盜也後進偽公文以冒金繒或發其  
姦公曰此真我作是日偶體惡弗能工耳一日遊  
盤龍塘夜宿普門寺盜乘隙竊所畜殆盡質明家  
人往白賦詩不輟徐曰老鐵在是即長物與人共  
可也接引人物稱賞或過其實即有深隙者無一  
詬語相荅天下以為長者公沒而宋文憲為之志  
余耳公最熟頗慕其人因叙其行且為之贊贊曰  
壯而遭亂不早集枯晚而逢治不羨栖梧準繩鳥飛  
變化鵬圖雖人與羣實天為徒濬發厥辭如騁駒駘



流虹震霆匣出錕鋌樹旆揚旌金甲瑠戈擁翼萬靈  
蹴踏三吳螳螂斂臂魑魅驚呼九華文人攜手天都  
笑彼齷齪拱翼泥途

馮元成集

顧阿瑛贊

有序

明馮時可

顧阿瑛一名映字仲英家崑山界溪以質雄于鄉  
輕財結客豪宕自喜年三十折節讀書益購古書  
各畫彙鼎築別業苕涇西曰玉山草堂日夜與客  
置酒賦詩四方名士河東張翥會稽楊維禎天台  
柯九思永嘉李孝光及方外士咸主其家園池亭  
榭館舍聲伎並甲一時仲瑛才瞻思捷聲調秀逸

與諸名勝旗鼓相當嘗舉茂才署會稽教諭辟行  
省屬官皆不就張士誠入吳強宦之乃去隱嘉興  
合溪復渙釣五湖三泖間丙申歲泰州兵入奉母  
寓吳興蘭溪母喪祝髮廬墓後寄居吳下名利閱  
大藏經重誦尚書論語年五十自營壽藏曰金粟塚  
成與賓客燕集唱和自號金粟居士行戒子孫他  
日葬以苧衣桐帽椽鞋布鞵勿用綺繡自為誌又  
自題其像曰儒衣僧帽道人鞋到處青山骨可埋  
若說少年豪俠處五陵鞍馬洛陽街所著詩曰玉  
山璞犒華亭館蒲咏又梓其賓客所賦詩曰草堂



雅集洪武初隨其子武畧將軍元臣遷臨濠卒贊  
曰  
以酒自澆以詩自豪羣麗萃勝好樂陶陶三隱匪名  
一徙惟遭初若厥寂卒乃離羣率莫不營仕運不勞  
一窺龍藏萬事鴻毛且玄且釋亦孔亦克我懷其人  
天際超超馮元成集

伯顏子中贊

明王世貞

故元史部侍郎事見傳中贊曰  
元虐用民自絕上下天改魁魁汨此中土匪之商帥  
擁強首鼠亦有貞士膏領齊斧矯矯伯顏儒跡攸奮

豈厭原祿而強顏運毀質自藏庶保厥愠北眺龍沙  
王圖蹇遭南顧吳墟大明中天帝曰起之臣則死之  
苟覩今是為恤故非彼胡之躁淫乃有碩德胡弗庸  
蚤寔視其魄命州山人稿

蔡子英贊

前人

故元行省參政事見傳中贊曰  
王庭奄如帝宥弗剪彼其子心矢不可卷豈薄華風  
大鹵是腴抗心長揖匿跡貨舂恩割儷體目無鉞曾  
矯若秋霜燁如火虹覽書者何惟明皇帝仁不奪軀  
義不奪志舍是後夫風我來裔同上



林仲山像贊

明 鄭文康

林中敬人林補仲山華亭人河東王墩傳曰高祖少雅宋潮州推官祖和御前元德慶儒學教授考德載平江崑山同知仲山襲父蔭歷官至某官張氏假王吳召公公歎曰元君也張賊也背君事賊吾不忍為遂隱去自題其像曰清非清俗非俗身居市廛志在巖谷見之者呼為老林友之者識為知音叩其中則空空如也問其長則能固窮而不動心開封鄭文康高其人拜瞻遺像於七十年之後僭擬而為贊焉

學務道禮矯俗黃鳥喬枝白駒空谷氣之壯怒髮如林聲之和太古雅音觀其像則一遺老也讀其傳則知忠義而不易心 予橋稿

元鎮東儒學提舉朱澤氏先生鏡容贊 并序

明 徐枋

旌表貞節朱太夫人睢陽之裔也先學士文靖公奉母純孝篤渭陽之誼與朱氏宗黨周旋無間居恒尤喜稱說外家文獻故余小子童時即得備聞朱氏之前言往行焉猶記崇禎癸酉歲之端陽朱太孀汝梅氏敬奉其先世所藏睢陽五老圖乞先



文清公題詠五老者即宋丞相杜祁公太子賓客  
王公渙光祿卿畢公世長尚書郎馮公平及兵部  
郎中朱公諱某者朱氏即其後也於時歐陽文忠  
公有次韻五老詩白髮憂民雖種種丹心許國尚  
桓桓可以見之矣余時年十二得觀五老之像瞻  
禮敬對不敢漫視又不能釋手又五年戊寅先文  
靖公延先師以發先生授經于余館吳趨里第先  
師攜其先世手澤赴館復得見澤氏先生鏡容及  
水亭圖余時年十七其為敬愛瞻禮亦同于五老  
圖因得遍讀諸名賢題識知朱氏世德之長不啻

崑崙之源而諸圖之去而復來及再失再得或聞  
幾傳或踰百載而完好如新復歸世守種種神異  
不減張僧繇所畫天竺先生像者豈非名德積爽  
與世長存固有不依形而立不恃力而傳者乎癸  
亥歲九月之朔先師長君致一偕其羣從過余澗  
上草堂復出鏡容水亭二圖屬小子題冊尾再一  
展禮回首如昨而距戊寅歲已四十六年余今年  
已六十二滄桑陵谷何可復言即先公先師捐身  
殉國亦三十九年俯仰今昔余與致一不覺相視  
泫然而七幸世守之如昔也敬係以贊贊曰



俾哉澤氏萃友之裔

朱氏自唐名仁軌者亦萃亦友稱萃友先生居雅陽

克世厥懿敦此大節蔚為名世文同三閭等比參審

昔賢所目公辰我為公不驚時時其舍旃入參文苑

出寄我索在所著績原本于學為仕為隱不愧不作

存後同初何遜漁洛

公精于理學有存後齊集同初銘斷石著異摹

鏡稱神於戲偉哉鬱林後身

公大父卜兆于陽山之

交符地過古墓得一勿奪我宅吾將為夫人孫次日役

重刻一碼仍舊徑之施夫人彼夢前偉文大曰再感

是夜公生詳武公墓誌

居為堂集

元馬國珍像贊

明文徵明

元賜旃靖逸處士省劄云皇帝聖旨哀集賢院竊

見儒人馬國珍稟性剛明持身雅正讀書學道志

操軼於古人樂善安閒簡靜宜為君子不為祿仕

安分山林可旃靖逸處士

噫是惟有元靖逸處士馬公之像貌質而揚道幽而

光義高天下名動帝王錫之命書陞以名旃考德無

慚於身有耀然而九重之意雖云能極其褒而一時

議者猶恨未抵於用是徒見道行之可尊夫孰知隱

者之所重蓋雖真宗之賢不能奪魏野之志而和靖

之稱適用為孤山之寵也是以節義顯如光於里閭



聲名煒如久而弗渝余生百數十年之後亦得以起  
敬於丹青之餘 甫田集

周壽誼贊

明申時行

古稱黃髮始背親齒超然大齊人世有幾君產宋季  
迄我皇明優游考槃百十六齡布衣芒屨入覲真主  
飽食大宮親承天詔祖割醢饋將開明堂迹矣白駒  
來歸故鄉惘惘客星煌煌壽曜三江五湖同懸絃照  
清朝盛事眷社高蹤慈及後昆令名無窮 賜問堂集

百十六翁周壽誼贊

明馮時可

人生寄耳胡為癡癡爭矚競喧與日俱馳曷若周公

坦坦施施誰美誰好天耦人疇養性攝生以越期頤

隱宋避元入明乃儀一十三帝蟬蛻蓑衣兵火彌天松

栢挺枝目全天安寧有他奇鉛汞龍虎知邪不知 西元成集

高侍郎李迪贊 有序

前人

高侍郎名啟字季迪別號槎軒長洲人少有縱橫  
才畧於書無所不讀尤粹於史曰此固經世具他  
葉靡者何當成敗其文喜辯擊馳驟上下精未煥  
發歌詩首變元體沈鬱幽遠得風人趣五七言律  
直接開元大曆間難以劉白語長門怨云若明猶  
不奈妬極是情深郊壘云僧來雙屐雨溪臥一舩



霜秋興云梁寺鐘來殘月落漢宮砧斷早鴻過又如函關月落聽鷄度萃嶽雲開立馬看松風吹壁鶴翎墮梅雨過溪魚子生簾外鐘來初月上燈前角斷忽霜飛皆共警語元末張士誠王吳承制以淮南行省參政饒介為上佐介有文學嘗羅致名士第其篇咏放時年十六或薦於介介令賦詩驚異其才勞以金帛至意放良厚以薦于士誠士誠欲官之放謝去依婦周德吳淞江之青丘有青丘子歌高皇帝即位召修元史授翰林院編修已乃命教坊臣子弟忽一日與同官謝徽召對便殿稱

上旨時已暮面授啟戶部侍郎徽吏部郎中啟自陳年少不經為吏未習握筭固請歸詔許之賚金一鎰啟復歸青丘教門徒自給時魏觀以太常卿守吳郡啟往以史事為觀屬雅相知契及觀來徙啟居城中延問政事得失接見甚密衛師與守抗禮觀以己名卿侮易師師恚甚會觀欲徙郡治乞啟文上梁衛帥因誣觀徙治在故王府有異志并誣啟上命御史張度廉其迹度受帥中不為辨詔逮至都啟所撰青丘子歌有不聞龍虎苦戰鬥句上惡其語與觀同死西市天下惜其才而悼其冤



時年三十九所著有年鳴鳧藻兩集觀亦苦心劬  
勩安集吳民甚有政績吳民聞之多涕泣者自是  
故王府遂為廢丘莫敢室其上贊曰

公起明初其詩始冒射雕胡兒鼓瑟齊姜悲壯並詣  
撫宮弄商偽朝懷寶聖代褰裳陳力辭官出處章章  
孔碎惟毛麝殞惟香隱矣安文天亦妬良瓊編昭岳  
千古彌芳青丘何所白雲莽蒼同上

楊廉訪孟載贊

有序

前人

楊基字孟載先本蜀人王父宦于吳基生焉幼警  
敏九歲誦六經口嘖嘖勿止稍長作詩有奇語會

簪楊維禎寓松江時來吳下文名籍甚自以樂府  
冠絕一時睥睨無人基謁之就坐賦錢笛歌維禎  
驚曰吾謂詩逕已蕪乃有孟載耶遂與俱東弱冠  
著書十萬餘言名曰論監走試儀曹弗偶會天下  
亂歸隱赤山有終焉志久之詩名益起與高啟張  
羽徐賁稱吳中四傑元左丞周伯琦鎮江南貴倨  
甚廳事惟設一席客至皆立談惟基見輒坐榻款  
語極歡邀之仕卒不應張仕誠據吳辟致之即辭  
去王師平吳籍置臨濠又遷之豫後起令榮陽復  
以罪徙用薦為從史又以罪斥再起奉使還授員



外郎出按察山西竟以讒逮後鐘官卒是時方峻  
法士少有過輒從吏議公不能以庸庸免蓋其才  
使然與詩雋永有韻五言如石枕支頤冷江瓢漱  
齒腥斷甕沈沙嘴殘碑露石稜空濶魚龍舞娉婷  
帝子靈花踈寒食後人遠暮帆前七言如六朝舊  
恨斜陽外南浦新愁細雨中樓上綠珠知報主座  
中紅拂解憐才為世所傳誦贊曰  
偽朝招而兩遁果逸民耶聖朝用而三仞果直士耶  
龍卧于前蠖屈于後豈始智而終鈍耶武不能介文  
不能裾胡不竟長林而老大壑耶 同上

俞都昌有立贊

有序

前人

俞公初名楨後名貞木字有立吳縣人石澗先生  
瑛之係瑛有名前代公自少篤志好學工古文詞  
既冠以學未博弗娶負笈受永嘉陳公麟易元季  
不仕杜門讀書泊如也洪武初以薦受詔之樂昌  
令丁父艱服闋改都昌公兩令邑皆崇禮化濯蠹  
滌煩一切破尺幅行之有古循吏風再以母喪歸  
為親族往治所坐法例弗起郡守姚善向文學尊  
禮有道雅重貞木以其子師事之數延致於庠行  
乞言禮以風民俗貞木多薦達士貧士因以進者



甚多其他能重自克無私語晚歲勵志常食糠覈  
爨火不繼靖難師起公勸守勤王會鄉人以他事  
誣公建文帝逮公至京卒于邸年七十有一明年  
太宗入太守善被族而公以先事逮家得無恙贊  
曰丁父讎雖死無憾公之忠義豈止此乎  
其官也如隱其隱也如不有官敦苦芳冰清奮義芳  
霜寒遭萋菲芳身獨完困囹圄芳家獲安何世之不  
察其素何天之獨鑑其丹福耶福耶何循環之無端  
同上

明處士儉齋先生吳公贊

明汪道昆

汪伯子曰余讀汪大夫所為吳公傳未嘗不忻慕  
其為人嗟乎舉世務奢溢僭差而公以儉德著使  
公而在余願操几杖不辭焉贊曰

於皇遙緒時維延陵素封輻輳朱紱雲興未流昌被  
豪舉橫行都人連騎編戶重茵猗歟吳公積居傾縣  
負俗獨行折節為儉衣不完采食不貳膳既薄紛華  
亦去健美丁年任俠躡屩周游垂堂舟楫稅駕林丘  
言遵舊服倣載先疇評高月旦慶襲芳裘爰及季年  
遂蒙渥澤黃耆維祺寵章有赫往駕莫援來芳無斁  
洵美後昆有嚴宗祏

大函集







